

[Augsburg], 8. Februar 1580

An Joachim Camerarius d. J.

UB Erlangen, Briefslg. Trew, Wolf, Hieronymus, Nr. 13.

S. 20 Decembris, Clariss[ime] vir, D[omine] et amice colende, gratias egi liberalitati tuae de donata Iliade, et ut ad me mitteres, si qua è paterno Suida excripsisses, petij. Ac literas eas ad fratrem meum perlatas esse persuasum habeo: vereor tamen, ne per illius absentiam interciderint: cum neque ab illo neque abs te quicquam interim responsi acceperim. Quia verò heri σὺν θεῷ molestissimo labore Suidae Graeci relegendi sum defunctus: nunc interpretationem Latinam meam recognoscere et locupletare in animo est: Neque verò paruam accessionem paternae annotationes, ac potius multum ornamenti lucubrationi meae adiungere poterunt. Neque tamen peto, ut in eo mihi gratificeris, nisi tibi ante persuaseris, ut id libenter facias, et commodo tuo. Vt enim humaniss[imi] parentis tui dictum repetam: I<d> quisque facere posse dicitur, quod commodè facere potest. Ac fortasse praestabit, te ipsum illas additiones interpretari: cum et facilè possis, et ad officium tuum pertinere videatur, ne ego falcem in tuam messem mittam: Nam, quod antehac scripsi, mihi in Suida tam Graeco quam Latino neque seritur neque metitur. Fungor autem officio debito ac necessario: ut typographo de me bene merito, etiam cum iactura ipsius, morem geram. Illud autem fides nostra postulat, ut Annotationes paternas illi mittas, ut, si suis locis commodè inseri nequierint, ad calcem operis reseruentur: quod idem de meis quoque correctionibus, et nonnullis additionibus ex Harpocratone et Stephano, fieri cupio. Sed ista tua et typographi cura erit. Sed ab humanitate tua peto, ut me statim certiorem facias, an paternas additiones Episcopio certò polliceri tuo nomine possim? ne se à me deceptum esse conqueri possit. Vale, et D. fratri atque communib[us] amicis multam ex me salutem. 8 Februarij Anno 1580.

Hiero[nymus] Wolfius
Tuus.